



Broj/Број: 4/1-50-1-9-29/06
Sarajevo/Сарајево, 24.1.2006.

ZAPISNIK

29. sjednice Zajedničke komisije Parlamentarne skupštine BiH za odbranbeni i sigurnosnu politiku i nadzor nad radom odbrambenih i sigurnosnih struktura na nivou BiH

Sjednica je održana 24.1. 2006., u vremenu od 10,00 do 11,00 sati.

Sjednici su prisustvovali članovi Zajedničke komisije:

Boško Šiljegović, Vinko Radovanović, Šefik Džaferović, Vinko Zorić, Osman Brka, Adem Huskić,
Momčilo Novaković i Branko Zrno.

Sjednici nisu prisustvovali: Halid Genjac, Anto Spajić i Mirko Blagojević.

Sjednici su prisustvovali i gosti: Christijan Haupt i Rodolphe Oberle iz OSCE-a;

Dragica Hinić, sekretar Zajedničke komisije; Željko Grubešić, ekspert za vojna i sigurnosna pitanja;
i Albina Ibrahimagić, volonter u PSBiH.

Sjednici Zajedničke komisije za odbranbeni i sigurnosnu politiku i nadzor nad radom odbrambenih
i sigurnosnih struktura na nivou BiH predsjedavao je Boško Šiljegović.

Za sjednicu je predložen

DNEVNI RED

1. Dogovor o pitanjima koja će biti tema razgovora u okviru posjete Ministarstvu odbrane BiH;
2. Tekuća pitanja:
 - a) Obavještenje Vijeća ministara BiH povodom usvojenih zaključaka Zajedničke komisije za odbranu i sigurnost i Zajedničke obavještajno-sigurnosne komisije;
 - b) Izvještaj o posjeti LOT Timu EUFOR-a u Bugojnu i fabrici namjenske industrije „BINAS“ Bugojno;
 - c) Informacija o održanom sastanku u Ministarstvu odbrane BiH, 20.1.2006.;
 - d) Dogovor o upućivanju telegrama saučešća predsjedniku Odbora za odbranu i sigurnost Skupštine Crne Gore zbog željezničke nesreće;
 - e) Razmatranje prijedloga za dostavljanje informacije o slučaju „Abazović“;
 - f) Kratka informacija o toku izrade Prijedloga orijentacionog radnog plana Zajedničke komisije za 2006.

Dnevni red članovi Zajedničke komisije usvojili su jednoglasno.

Ad. -1. Dogovor o pitanjima koja će biti tema razgovora u okviru dogovorene posjete Ministarstvu odbrane BiH

Boško Šiljegović informirao je da je posjeta Ministarstvu odbrane BiH trebalo da bude realizirana prošle godine, ali nije zbog mnoštva preuzetih obaveza članova Zajedničke komisije. Prilikom ove posjete članovi Zajedničke komisije trebalo bi da budu upoznati s predstojećim tranzicijskim procesima do kojih će doći prilikom realizacije usvojenih zakonskih projekata u ovoj oblasti. Zato će razgovorima prisustvovati i predstavnici Tima za tranziciju pri Ministarstvu odbrane BiH. Ovaj tim osnovan je 12.1.2006., i čini ga 12 predstavnika Ministarstva odbrane BiH i sedam stranih predstavnika MPRI. Istaknuo je da je pripremljen određeni broj pitanja na koja bi trebalo zatražiti odgovore prilikom posjete Ministarstvu odbrane BiH, koja će uslijediti nakon završetka ove sjednice Zajedničke komisije. Osim ovih pitanja o kojima članovi Komisije mogu dati svoje mišljenje, mogu također predložiti i druga pitanja koja smatraju primjerenim za ovu priliku.

Adem Huskić smatra da bi, osim navedenih pitanja kojima je obuhvaćeno mnogo problema, trebalo postaviti i pitanje izrade pregleda pokretne i nepokretne imovine koja jeste odnosno nije perspektivna.

Šefik Džaferović naglasio je da bi pomenutu posjetu trebalo iskoristiti za dobivanje informacija o aktivnostima koje je Ministarstvo odbrane BiH uradilo u prethodnom periodu, kakvi su planovi u toku ove godine, s posebnim osvrtom na probleme do kojih može doći u procesu tranzicije, te pogled na ulogu Zajedničke komisije i Parlamenta u ovom procesu kako bi on bio što uspješniji. Džaferović smatra da će danas, kao najznačajnije, biti postavljeno pitanje visine budžeta odbrane i njegovog neusvajanja. Pri tome Zajednička komisija mora jasno iskazati svoj stav da u potpunosti podržava projekciju budžeta Ministarstva odbrane BiH, u čijem je kreiranju i učestvovala. Što se tiče pripremljenog spiska pitanja, saglasan je da se dostavi Ministarstvu odbrane BiH kako bi u nekom razumnom roku ono odgovorilo na njih.

Christijan Haupt informirao je prisutne da je članom 75. Zakona o odbrani BiH utvrđena obaveza Tima za tranziciju da najmanje jednom mjesečno, a po potrebi i češće, obavijesti ministra odbrane BiH o procesu tranzicije, a da potom ministar informira Zajedničku komisiju.

Nakon rasprave, članovi Zajedničke komisije usvojili su jednoglasno sljedeće **zaključke**:

1. U skladu s članom 61. Zakona o odbrani BiH, Zajednička komisija zahtijeva od ministra odbrane BiH da jednom mjesečno, a po potrebi i češće, na osnovu informacija Stručnog tima za provođenje tranzicije, obavještava Zajedničku komisiju o procesu tranzicije.
2. Zajednička komisija za odbrambenu i sigurnosnu politiku na nivou BiH zahtijeva od Ministarstva odbrane BiH i Stručnog tima za tranziciju, kao njegovog sastavnog dijela, da u roku od 15 dana dostave pisani odgovor na pitanja koja su bila razmatrana na 29. sjednici ove komisije, i koja se dostavljaju predstavnicima Ministarstva tokom sastanka 24.1.2006.

S obzirom da je dogovorena konferencija za novinare nakon sastanka u Ministarstvu odbrane BiH, za davanje izjava na ovoj konferenciji određeni su: Boško Šiljegović, Branko Zrno i Osman Brka, dok će predstavnici Ministarstva odbrane BiH biti određeni tokom sastanka.

Ad.2. Tekuća pitanja:

a) Obavještenje Vijeća ministara BiH povodom usvojenih zaključaka Zajedničke komisije za odbranu i sigurnost i Zajedničke obavještajno-sigurnosne komisije

a) Boško Šiljegović istaknuo je da je, po dostavljenoj Informaciji Zajedničke komisije za odbrambenu i sigurnosnu politiku BiH i Zajedničke sigurnosno-obavještajne komisije za nadzor nad radom OSA-e BiH o razgovoru s predstavnicima Glavnog štaba NATO-a iz Brisela o Sigurnosnom sporazumu i uslovima koje BiH mora ispuniti da bi bila potpisnica navedenog sporazuma, Vijeće ministara BiH dostavilo samo kratko obavještenje o tome da je raspravljalo i podržalo zaključke komisija. S obzirom da je ovim zaključcima od Vijeća ministara BiH i Interresorne grupe zahtijevano da dostave informaciju o realizaciji aktivnosti neophodnih za potpisivanje Sigurnosnog sporazuma, te od Vijeća ministara BiH i Predsjedništva BiH da osnuju državno sigurnosno tijelo u skladu s članom 75. Zakona o zaštiti tajnih podataka, prema rokovima utvrđenim u Nacrtu sigurnosnog sporazuma, Zajednička komisija usvojila je sljedeće **zaključke**:

„Traži se od Vijeća ministara BiH i Interresorne grupe, u kontekstu prethodno usvojenih zaključaka zajedničkih komisija Parlamentarne skupštine BiH od 8.12.2005., da u što kraćem roku dostave kompletnu informaciju o realizaciji aktivnosti neophodnih za potpisivanje Sigurnosnog sporazuma;

Zahtijeva se od Vijeća ministara BiH i Predsjedništva BiH da osnuju državno sigurnosno tijelo u skladu s članom 75. Zakona o zaštiti tajnih podataka, prema rokovima utvrđenim u Nacrtu sigurnosnog sporazuma, te je neophodno dostaviti informaciju o stepenu realizacije ove aktivnosti.“

b) Izvještaj o posjeti LOT Timu EUFOR-a u Bugojnu i fabrici namjenske industrije „BINAS“ Bugojno

Članovi Zajedničke komisije informirani su o posjeti LOT Timu EUFOR-a u Bugojnu i fabrici namjenske industrije „BINAS“, 8.12.2005. Posjeta je obavljena u organizaciji švicarskog ambasadora u BiH, a Zajedničku komisiju, tom prilikom, predstavljali su članovi: Adem Huskić, Branko Zrno, Osman Brka i Anto Spajić, te Dragica Hinić i Željko Grubešić. Posjeta Bugojnu iskorištena je i za razgovor s rukovodstvom fabrike namjenske industrije „BINAS“. Posjeta je rezultirala i određenim brojem zaključaka.

Članovi Zajedničke komisije su, nakon kraće rasprave, jednoglasno usvojili Izvještaj o navedenoj posjeti s predloženim zaključcima, čiju realizaciju treba pratiti.

c) Informacija o učešću na sastanku u Ministarstvu odbrane BiH, održanom 20.1. 2006.

Željko Grubešić obavijestio je prisutne o učešću i usvojenim zaključcima na sastanku održanom 20.1.2006. u Ministarstvu odbrane BiH, na kojem su učestvovali predstavnici Ureda sekretara odbrane SAD-a. Članovi tima su, u ime Ureda sekretara odbrane SAD-a, iznijeli svoju viziju trenutnog stanja u BiH u pogledu priključenja PFP i NATO-u. Zaključak s ovog sastanka je da koordinacija na nivou BiH u tom procesu nije dovoljna. Zato je ovaj tim zamolio da Ministarstvo odbrane BiH zatraži pomoć od SAD-a što prije, jer su oni potpuno spremni da je pruže. Istaknuo je također da bi i Zajednička komisija za odbranu i sigurnost trebalo da prati i ima izvještaj Interresorne grupe BiH koja se bavi pitanjima vezanim za priključenje Bosne i Hercegovine PFP-u i NATO-u.

Adem Huskić predložio je zaključak da se osnuje tim pri Ministarstvu odbrane BiH, Vijeću ministara BiH ili pak da bude interesornog karaktera, koji bi se bavio pitanjem pripreme i lobiranja za pristupanje Bosne i Hercegovine PFP-u i NATO-u. Bilo bi potrebno da taj tim mjesečnim izvještajima informira Zajedničku komisiju o obavljenim aktivnostima.

Željko Grubešić istaknuo je da je taj tim već osnovan pod nazivom Državna međuresorna komisija za PFP i NATO, ali da su evidentne slabosti u njegovoj koordinaciji.

Christijan Haupt također je naglasio slab rad navedene komisije, te je u kontekstu prethodne rasprave predložio da Željko Grubešić obavlja dužnost posmatrača u ovoj komisiji.

Osman Brka saglasio se s mišljenjima prethodnika, te smatra da bi trebalo utvrditi članove navedene komisije i pokrenuti pitanje odgovornosti.

Nakon rasprave, jednoglasno je usvojen sljedeći **zaključak**:

„Zajednička komisija zahtijeva od Državne međuresorne komisije za PFP i NATO da joj u roku od 10 dana dostavi spisak svojih članova, te da je izvijesti o do sada urađenim aktivnostima, o planovima za naredni period i navede prijedloge o eventualnim vrstama pomoći koju joj može pružiti Zajednička komisija, kako bi u procesu priključenja u PFP i NATO bilo što manje problema. Također, Zajednička komisija zahtijeva od Državne međuresorne komisije da je kontinuirano jednom mjesečno izvještava o planiranim i realiziranim aktivnostima.“

d) Dogovor o upućivanju telegrama saučešća predsjedniku Odbora za odbranu i sigurnost Skupštine Crne Gore zbog željezničke nesreće

Boško Šiljegović predložio je da Zajednička komisija uputi telegram saučešća zbog željezničke nesreće predsjedniku Odbora za odbranu i sigurnost Skupštine Crne Gore Draganu Kujeviću, što su članovi Zajedničke komisije jednoglasno prihvatili.

e) Razmatranje prijedloga za dostavljanje informacije o slučaju „Abazović“

Boško Šiljegović predložio je da Zajednička komisija zatraži od Ministarstva sigurnosti BiH informaciju o slučaju „Abazović“. Istaknuo je da je i Predsjedništvo BiH uputilo zahtjev za dostavljanje informacije o ovom slučaju, pa bi bilo dobro da i Zajednička komisija, u čijoj su nadležnosti ovakvi slučajevi, zatraži identičnu informaciju. Prijedlog je jednoglasno usvojen.

f) Kratka informacija o toku izrade Prijedloga orijentacionog radnog plana Zajedničke komisije za 2006.

Boško Šiljegović dao je kratke napomene o aktivnostima koje očekuju Zajedničku komisiju u 2006., a koje treba da budu sastavni dio njenog Orijentacionog radnog plana. Naglasio je da su upućeni dopisi i resornim ministarstvima za dostavljanje podataka o njihovim aktivnostima u toku ove godine, kako bi ih uvrstili u Orijentacioni radni plan Zajedničke komisije. Zato bi ovaj plan, najvjerojatnije, trebalo da se nađe pred Zajedničkom komisijom na njenoj sljedećoj sjednici.

Sekretar
Dragica Hinić

Predsjedavajući
Zajedničke komisije
Boško Šiljegović

ZAKLJUČCI:

1. U skladu sa članom 61. Zakona o odbrani BiH, Zajednička komisija zahtjeva od ministra odbrane BiH da jednom mjesečno, a po potrebi i češće na osnovu informacija Stručnog tima za provođenje tranzicije, obavještava Zajedničku komisiju o procesu tranzicije.
2. Zajednička komisija za odbrambenu i bezbjednosnu politiku na nivou BiH zahtjeva od Ministarstva odbrane BiH i Stručnog tima za tranziciju, kao njegovog sastavnog dijela, da u roku od 15 dana dostave pisani odgovor na pitanja koja su razmatrana na 29. sjednici ove komisije i dostavljaju se predstavnicima Ministarstva tokom sastanka 24.01.2006. godine.